

DISSERTATIO MEDICA

INAUGURALIS,

DE

DIABETE.



Digitized by the Internet Archive  
in 2019 with funding from  
Wellcome Library

<https://archive.org/details/b30786599>

DISSERTATIO MEDICA  
 INAUGURALIS,  
 DE  
 DIABETE:

QUAM,  
 ANNUENTE SUMMO NUMINE,

EX

Amplissimi SENATUS ACADEMICI auctoritate et consensu,

Ac Nobilissimae FACULTATIS MEDICAE decreto;

PRO GRADU DOCTORATUS,

SUMMISQUE IN MEDICINA HONORIBUS ET PRIVILEGIIS  
 RITE AC LEGITIME CONSEQUENDIS,  
 ERUDITORUM EXAMINI SUBJICIT

GULIELMUS STEVENSON,  
 HIBERNUS.

Ad diem 10 Augusti, hora locoque solitis.

*Dum relego, scripsisse pudet, quia plurima cerno,  
 Me quoque, qui feci, iudice, digna lini.*

OVID.

EDINBURGI:

Apud HAMILTON, BALFOUR, et NEILL,  
 ACADEMIAE TYPOGRAPHOS.

MDCCLXII.



# P A T R I   S U O.

**T**IBI, prae aliis, care Pater, ut hocce opusculum inaugurale, primos studiorum conatus, dicarem, nihil incitamenti, nihil officii est, quo non sum devinctus. Neque ob id quod tibi etiam debeo ut existam, utpote naturae mandatis constitutum, licet hac ipsa de causa, omnium iudicio absolutus forem; sed quoniam, ob mores humanissimi nominis, tu es paucorum hominum, inductus sum. Nec perinde vereor, quempiam me in eorum culpam incidisse dicturum, quibus, nullo discrimine ac pleno ore mos est laudandi: Ubi enim nihil mercedis, ad spes effica-

efficacissime elevandas, praesto est, nihil fors-  
san adesse potest blanditiarum. Propterea  
quod vero, temporum moribus venit, ut lau-  
datio, praesertim consanguineo ex ore, quo-  
modocunque digna, speciem assentationis  
prae se ferat; huic studio, quam par est te-  
nuiori, pietatis officium consequendi, finem,  
tuae voluntati nimirum obsequens, impono.  
Vale.



# DISSERTATIO MEDICA,

D E

## DIABETE.

CUM universus mundus conditus in conspectum venit, vel id immensum scilicet vacuum, cujus fundus explorari nequit, in quo celeritate mirabili circulos suosque cursus planetae conficiunt, illico summam supremi Opificis majestatem, non sine oblectamento mirabundi veneramur; ob benignitatis indicia, consiliique vestigia in eo nimirum mirabiliter exhibita. Perinde etiam, quodocunque constitutionem rerum sapientissimam rite perpendamus, cum magnitudine, diversitate, variis multiplicibusque earum vicissitudinibus, omnia statim admiratione dignissima nostras quasi obruunt facultates.

Non, veruntamen, in magnis solum, sed in parvis similiter agendi ratio summi conditoris admiranda enitet. Rerum nostro in orbe administratio; origo regnorum et casus; tempestatum permutationes, constanter ac mirifice progredientes, nec non et diei noctisque consecutio; animalium varietas adeo infinita, tam aquatiliū, quam terrestrium, ut

A

nemo

nemo adhuc recensere potuerit ; si etiam silentio regnum vegetabile ac metallicum, in quo non solum ad vitam accommodate perfruendam, sed item ad hominum delicias quod attinet, alma natura suppeditaverit, praeterirem : Ex his omnibus denique manifestissime apparet, maxima animi pertinaciâ haud obstante, et cui quidquam pensi unquam fuisset, mundum, a Deo primitus creatum, semper ejus potestate pariter esse conservatum, ac mente felicissime gubernatum.

ENIMVERO autem, longe prae caeteris, corpora animalium intellectûs vestigia maxime indicant ; praecipue corpus humanum, in quo invenimus, quod communi adagio dici solet, *multum in parvo*, et mundum quasi minuta formâ pictum.

HOMINI percurioso, in rerum conditarum investigatione, sive in arte corpora humana secandi perito, affatim apparet, nihil tam summa cura confectum, quoad omnes quascunque partes, deprehendi posse. Non est in verbis, etiam disertissimis, non porro in tabulis anatomicis, quomodocunque accuratis, quantum in eo peritiae et machinationis, quantum nexûs et usûs, depingere. Et deinceps, si ab his interne perpenſis, nos oculos ad externam ejus formam, adeo egregie constructam, advertimus, vix efficere quimus, illico corporis majestatem, statûs similiter concinnitatem pulchritudinemque



que vultûs, ad sidera admodum erecti, non admirare: Adeo ut, haud res tam miranda fuisset, si populi feroces, quos historia solis effingit cultores, inter se aliquem, formositate vel staturae granditate maxime praecclarum, sole posthabito, adoraverint. Praeterea, haud dubitandum est, quin homo augustum id nomen, quo filius Deorum nuncupatur, adeptus erat, non minus ob egregiam corporis formam, ac speciem oris, quam mentis etiam facultates adeo eximias.

NIHILOMINUS vero, cum corpus humanum, adeo fabre, venusteque formatum, aspicimus, utpote in eo numen nihil emendandum reliquit, fieri nequit quin quispiam alte revolvens animi moerore admodum afficiatur, non immortale esse, at potius moriendum, et in ruinam, heu! juxta ac vilissima rerum, incidendum. Sed etiamsi, nil non mortale habemus, et deflorescit formae dignitas morbo, nihilo secius tamen, illa pars hominum primigena, qua ad coelicolas similitudine accedimus, ad EUM, a quo primo demigraverit, utpote spirituum est quasi magnus universusque Parens, confidenter denuo revertitur.

AT nonnulli forsan, nos in opus alienum ire notatum habeant, et insuper, quod potius moralium aliquem philosophorum, quam medicinae candidatum, de talibus differere decet. Fateor; et quantumlibet hoc nobis vitio verterint, boni tamen consulimus,

ea, scilicet lege, ut nihil gravius in nos dicant : Eodem vero tempore, haud nobis exploratum est, quin inter rem medicam et ethicam, haud parva sit convenientia : Praeterea, si in rebus hujusmodi quid nobis judicandi juris est, opinio nostra fert, quod medicum, in studiis propriis non duntaxat bene eruditum, sed ob omnes etiam probos mores, laude imprimis dignum esse oportet. — Sed ad proprium opus nunc accingi decet.

Hoc argumentum, in quo de Diabete perpauca dicere mihi constitutum est, prae aliis, secundum almae hujus Academiae leges, non quod in eo, ad aliquid novi excutiendum, accinctus sum, sed potius quia, eorum haecenus perraro apud condiscipulos tractatorum, id solum superfuit, selegi. Longe aliter quidem res se habet ; si vero a mea voluntate pependerit (non adeo infeliciter scribendi pruritu titillor) omnino siluerim : Pro certo enim habeo, quod olim hancce adeo rudem indigestamque dissertationunculam, scripsisse pudebit. Sed durum telum necessitas : Nobis, si Academiae institutis obtemperare volumus, obligatio est, utcunque munificentia naturae imparibus, quasi auctores inchoare. Porro, quoniam in hac re, nobis quod conditio proponitur, minime inducti sumus, magis vero quadam vi coacti ; in nos sane haud culpa inferri oportet, si forte parum accurati nostri conatus evadant.

QUANDO



QUANDO enim quis, nemine impellente, auctor fit, omnes non immerito illi vitio dabunt, si in magna ac frequentia errata labi contigerit. Sed longe secus est equidem, quando alieno nutu, non suoapte arbitrio, ad scribendum sese aegre dat. Cum itaque ex dictis excusationem adversus studiorum socios quodammodo habui; nunc pro nobismet, operis impoliti ratione, id quod admodum decet, venia petenda est.

PRIUSQUAM vero longius progrediar, non a proposito alienum foret, de natura partium et situ, in quibus praecipue hoc malum originem habet, haud equidem cum minutissima anatomici operis elegantia, quod haud ab in rebus medicis parum erudito expectandum, sed ita solum ut morbus confestim tractandus, magis dilucide quadantenus appareat, aliquantulum dicere.

## C A P U T I.

## BREVIS RENUM DESCRIPTIO.

RENES, qui a 'Pelv' nomen habere videntur, quia in pelvim urina quasi semper fluit, in regione lumborum situm tenent, unus hepar infra, in dextro latere, alter paulo superior, in sinistro, infra lienem.

nem. Ope emulgentium, ad cavam et aortam ligari, dum ureteres ad vesicam eos fortiter connectere solent. Ren dexter numquam non ad intestinum caecum, et interdum ad hepar; sinister ad colon et subinde ad lienem, vincitur. Longitudine sunt ad quatuor vel quinque digitos, latitudine tres, crassitudine duos; sed unum altero majorem esse haud raro contingit. Eorum figura, non valde phaseolo absimilis, in una parte concava, in altera convexa est. In foetibus substantia renum multis in lobis discretis, inter se molliter conjunctis, dividi solet; exinde vero alius alium concinnate quodammodo appropinquat, ita ut, in adultis, colore puniceo superaddito, superficiem omnino laevigatam et equalem habere videntur. Duae membranae eos involvunt, una peritonaea proficiscens, altera, quae illis propria est, et multo fere pinguedinis cooperta, quanquam nihil ex eo in parte interiore reperitur, unde verbum omnium ore tritum, renes atque avaros esse in medio adipis valde macilentos. Ab aorta arteriis, nervis ab intercostalibus et stomachicis; unde vomitiones in nephritico dolore violentes, suppeditantur: Eorum venae in cavam, et lymphatica in PECQUETTI receptaculum, defluere solent. Omnia haec vasa sub emulgentium nomine, concavo latere, renes perforant, et per totam materiem se in quam plures ramos dividunt; deinde in minores et frequentiores, donec ad exigua innu-

innumerabiliaque capillamenta, adeo ut gradus eorum minimus, ab oculis etiam acutissimis, vix, ac ne vix quidem, deprehendi potest, tandem evadunt. Haec omnia quoque, fere evanescentia, ad externam superficiem renum progredientia et ibi inter se mutuo inosculentia, rete quodammodo formant; unde redeuntia, extremitates eorum in folliculos infinitos terminare solent. Sanguis itaque, quem e corde arteriae evehant, propterea quod per hos tubos tam parvulos permeare nequit, venarum ramis emulgentium assumitur, postquam partes ejus fluidiores, et ad urinam suppeditandam aptae, fatis percolantur; et in venam cavam deinde effunditur. Hae glandulae, in circulum flexae, externam renum substantiam componere videntur, quarum quaeque tenuem semper tubulum mittit, ad internam etiam simul conficiendam.

PELVIS, in medio renum, dilatatione ureterum formata, cavitas est, cujus usus in eo consistit, quod urinam e papillis aperientibus circumcirca distillantem, recipiunt, quae fistularum uriniferarum sunt, in fasciculos parvulos congestae, extremitates.

RENUM praeterea officium in eo omnino versatur, quod e massa sanguinea, partes ejus sub urinae nomine fluidiores, cui nulla alibi data porta est, submovent; et hoc non modo per fabricam eorum admirabilem, nec non et vim cordis vicini impel-

lentem,



## 8      D I S S E R T A T I O

lentem, sed ope etiam musculorum lumborum atque respirationis.

ARTERIAE renales ab aorta sanguinem, cum urinae particulis mixtum, accipiunt: Deinde humor semotus in ramusculos laterales praeterlabitur; tunc ad tubulos BELLINI, per tortilem perplexumque cursum, defluens, in pelvim, perinde atque in receptaculum commune, cadit gradatim, vel potius, per multa exiguaque ora patula, assidue guttatim distillat; inde constanter ureteribus ad vesicam evehitur, ubi tandem, pro occasione et tempore, moratur, donec per urethram postremo egressum habet.

### C A P U T II.

#### OBSERVATIONES IN GENERE DE DIABETE.

DIABETES est vocabulum apud Graecos usitatum, sic dictus ἀπὸ τῆ διαβαίνειν, id est a permeando, ob velocitatem qua urinae transitus seu traductio fit, eodem modo quo per syphonem aqua traducitur, cui nomen διαθήτην mechanici dant\*. Idem affectus δίψακος, a siti insuperabili, interdum vocatur,

\* Nic. Pisonis de Morb. cogn. et cur. lib. 3. de Diabete.

vocatur, interdum ὕδρωψ εἰς ἀμίδα, sive aqua intercus ad matellam, et aliquando διαρροία εἰς οὐρά, quo intelligitur urinae fluxus, propter ingentem istius evacuationis copiam: Pro diversitate verum qua huncce morbum recensere solent, ita nomina ejus variant auctores. Sed apud Latinos nullum peculiare nomen sortitus est, quare urinae fluor solum appellabatur.

INTER hos, quorum impetui genus humanum rarissime subjicitur, morbus iste, de quo nunc agere fert animus, principio in conspectum venit. De hac re omnes fere auctores, quibus probe res medicas excolendi copia fuit, uno ore consentire videntur. Olim notavit GALENUS, bis tantum in praxi sibi occurrisse\*. Apud Lomium, praeterea, haec verba habemus, “ Nobis per omnem vitam non nisi semel apud Nervios, quum illic medicinae artem exerceremus, observatum fuit†.” Idem vitium rarissimum esse, etiam opinio fuit paulo ante BOERHAAVIANA, cui eximio quidem viro, nisi in uno juvene, quam maxime studioso, et ad abacum quasi agglutinato, nunquam obvenit. Huic adolescenti, ut omnino ad dormiendum abacta foret propensitas, haustus ex theae coffeeque infusione uberrimos, haud equidem eligendus fuit bibendi mos; quo parum caute usitato advenit, ut

B

non

\* Locis affect. lib. 6. cap. 3. Charter.

† Med. Obser. lib. 3. de Diabete.

non longo post tempore, hoc improvise extinctus malo, poenas luerit. De eodem magnus ille vir observatum reliquit, Diabete immedicabili, ac consumptione eam perceleri nimirum pede sequente, laborantem, larvae nudis ossibus cohaerentis speciem miserrime extitisse, et tandem, siti inexplibili oppressum, e vita discessisse\*.

POSTQUAM scriptores nonnulli aquosos tepidosque liquores, praecipue ex thea coffeeque diluta, adeo laudatos habuere, hic morbus, olim tam infrequens, saepius medico hodierno in praxi versato, sese obtulit. Diluta enim hujusmodi, urinam cientia, duobus modis injuriam facere solent, sanguinem scilicet plus satis diluendo, ac totum vasorum systema solidorumque compages relaxando. In tali rerum statu quidem nulla sanationis spes superesse videtur, nisi a diaeta sicca, satis lauta, et aliquantulum solida; ab omnibus aquosis quibuscumque abstinencia; libera perspiratione renovata, cum exercitio corporis mansueto, cutisque frictione omnibus horis conjunctis. Sed hoc in transitu leviter attingimus.

QUANQUAM ad Diabetem efficiendam, ut prius obiter notatum, harum herbarum, vel quorumcumque diluentium plus aequo calidorum, per longum temporis spatium, abusum, subinde satis valere concessu omnium datur; nihilominus vero, quaeque  
per

\* Instit. Med. § 824.



per vias urinarias emissio, plus nimio aucta, quod saepe post haustam magna quantitate aquam, nomine *Spaam*, evenire solet, nulla ratione Diabetes aestimari debet; nam veteres quidem, quod literis extat, consuetos fuisse, eam sub hac appellatione plerumque depingere, quam urina coloris quasi lacteoli ac spissitudinis associari observaverunt, haud vero ab simile videtur: Illa species certe, causa efficiente ablata, tantum pro tempore manet; haec vero semper inveterare, et perdifficile quidem, medelae auscultare censetur. Sed objiciendum hic forte erit, si illum, de quo sermo est, humorem fabrica renibus propria separatum, nunquam non fluidissimum oportet esse, quomodo fit, ut noxam plerumque secum ferre valet iste herbarum supra memoratarum usus, quae tantum post infusionem fluiditatis habere observantur, quantum per vasa renum minutissima, ad libere permeandum postulatur? unde itaque fit causa mali, sub quo tanta humorum mutatio, et corporis labefactatio contingere videtur? Non certe a visceribus urinam secernentibus speciatim affectis, sed potius quod tota temperies, vel systema, tam in fluidorum, quam in solidorum partibus, omnino remissum ac infirmatum a sanitate integra devenit: Quo per analogiam fit, humores universe depravatos, seu in distributione quam maxime turbatos, omnibus similiter vasis eorum vi contractili musculari orbatis, neces-

sario

fario evadere. Eodem modo quoque, ad corpus sustinendum, et ejus varias partes nutriendas, sanguis, ea qua gaudet sanitas consistentia omnino in dissolutionem abeunte, simul et semel inutilis fit; praeterea autem, singula viscera, et organa praecipue secretoria, virtutem ac tonum elasticum amittere, inde necesse est; et hinc denique, omnes, quicunque sunt, humores per emunctorium plus in usu secernendi occupatum, quales sunt viae urinae, nimirum e corpore labuntur; adeo ut, non longo post tempore, nihil fere praeter ossa cutemque superesse videtur.

EFFATUM apud medicos notum est, quodque vas, aequalibus vi premente gradibus, semper amplificari; quando nostra ideirco vasa, nimia quantitate, humores transmittant, eorum cavitas, ratione habita, dilatari debet; et quando res sic se habet, consequitur, in ea vasa distenta, liquores, haudquaquam aliter amplitudini eorum consentaneos, effluere; unde, ea in parte speciem quandam, omnino a natura aberrantem, (quod phaenomenon abnorme nomen morbi fortitur) decedentis locum occupaturam, satis constat. Hoc vero a sequentibus magis forte in lucem deveniet.

OMNIA in corpore humano, a minimis adusque maxima, quodam progressu constituto, procedere solent vasa: Hinc tota solidorum fluidorumque temperies in aequilibrio conservatur, sive ea corporis



poris conditio, quae ad valetudinem optime attinet, nascitur: Quo itaque magis ab ea distributione aequali decedunt, eo magis a statu valente corpus labefactatum subesse, patet; unde illa formidabilis malorum cohors, cujus dominio prima ab origine subjicitur genus humanum. Reliquum est itaque, priusquam sententias auctorum varias de nostro morbo in conspectum adferamus, nunc, pro ratione virium, qua in re integra corporis temperatura praecipue constare censetur, operam demus. Sed hoc quidem difficile admodum est, et vix unquam inter fines mediocres coërceri potest. Aggredior tamen, etsi me coactum iri id quodammodo infectum demittere, persuasissimum habeo, sed ut veteri adagio dici solet, “Fortuna audaces juvat.” Praeterea, in hoc persequendo, auribus nostris, de fideliâ eadem nos duos parietes dialbaturus, subservire haud vereror; si enim, qua ex origine hic plerumque status evenire solet, vel ad quas, in perennitate ac progressu, causas referri potest, in apertum adducere quimus, ab argumentis certe haud longe diversis, quo fit, ut haec bona validaque temperies aut laesa aut omnino everfa contingat, comperietur.

SANGUIS, e corde per magnam arteriam egrediens, omnium fluidorum insigniter compositus, per totum corpus disperforum, fons quasi primarius est, qui initio, sub lactei humoris specie, per ductum thoracicum continuo ad venam subclaviam ascendit; unde

unde ad dextrum cordis ventriculum, ope venae  
cavae descendens, ubi quodammodo colorem sibi  
rubrum assumere incipit, vitalis humor advehitur;  
ibique non diu permanens, in perlongo circuitu cir-  
cumagitur; per majora primo vasa defluens, tunc  
per ea in proximo sibi gradu decrefcentia, deinde  
in tertio, quartoque, donec tandem ad exilissima  
perventum est. In hujus processu ambitûs, liquo-  
res qui ad corporis diversa officia peragenda,  
perutiles sunt, faccis accommodis percolan-  
tur, vel per propria ostiola prolabuntur: Qui  
ad densitatem magis propensi, per ramos laterales  
grandiores; per ramusculos qui minus; et per  
eos denique ultimi ordinis, qui ad subtilissimam  
accedunt naturam; dum pari modo, particulae ex-  
crementitiae, quibus oeconomia laedi possit, organis  
secretoriis, ab utilioribus segregantur, et corpore  
foras postremo eliminantur. Omnes hae divisio-  
nes, vi in fabrica musculari cordis versante, cum  
ea forsitan virtute, in tunicis vasorum minimorum  
quasi oscillante, perficiuntur: Haec autem, ad il-  
las efficiendas, etsi recognita in aliis exemplis  
plurimum valere, minus forte auxilio fore compe-  
rietur. Hi fluores, ut rite secernantur, et per  
vascula eorum propria libere transeant, certa pro-  
batione tradere, quod totum systema vasculare in  
sano statu nunquam non oportet esse, haud difficile  
est: Pro ratione enim hujus integrae affectionis,  
bona



bona vel prava, apta vel inutilia, ad corporis munera rite explenda, semper liquida secreta existere inveniuntur.

FIBRARUM constituentium firmitas, vis quoque coercens, in vasorum tunicis assidue remanens, et denique, omnium actionum in corpore vigor, a proba humorum permeantium natura vel indole semper pendere; seu ut sanguis, aliorum thesaurus, quandam semper consistentiam vel crasin servet, postulare videntur: Quo magis ergo, ab hac crassitie recedat laudata, eo minus ad actiones vasorum organorumque secretoriorum promovendas necessario conveniens comperietur: Si densus, seu concretus, magis quam semper corporis usus aut leges salutis exigent; dein omnia mala, quorum inire numerum nemo fere potest, ab infarctione, vel obstructione, in quocunque gradu pendentia, sequi solent; sin minus autem, illa similiter innumerabilia, a debilitate, inanitione ac flacciditate provenientia. Sanitas itaque bene definiri potest, aurea inter utraque mediocritas; et morbus itidem, ad unum horum quam ad alterum proclivitas; etsi forsitan vix recusari queat, nonnullos quandoque morbos, ad alterutrum haud jure referendos, medico occurrere. Ex his vero duabus morborum causis, posteriorem pro origine agnoscit Diabetes, debilitatem scilicet nimiam, cum succorum inde acrimonia seu tenuitate.

## C A P U T III.

HISTORIA DIABETIS HUIC  
FIDEM FACIENS.

QUAEDAM mihi nota fuit, aliquot ante annis, virgo honestiore loco nata, aetate integra adhuc vegeta, cui cum alia, mihi veterata amicitia etiam conjuncta, ex intimis suis familiaribus, quando ad pocula ferotina theae ex consuetudine convenerunt, certandi erat mos, quatenus hauriendo cyathos altera superare poterat. In hoc vero foeminino admodum certamine, mares aemulari voluerant, apud quos semper, quod nemo quidem ignorat, usu venit, ut omnes, amacula alternis vicibus proposita, calicem ad summum marginem usque repletum propinent : Non aliter etiam, *ad animi curas depellendas*, se gerere solitae fuerunt nostrae virgines, bene scilicet ad pocula amasiunculo inter juvenes delectissimo vicissim dicendo : Et tantum valuit error, alio nomine enim haud adpellare licet, ut saepe *bibaces formosas*, trigesima uno vespere altrinsecus pocula exhaurire novi. Quid inde sequebatur? en ! paucis verbis : Temporis progressu, una virginum, namque perraro alteram mihi contigit observare, honestissima oris specie, nec non, et genarum colore admodum roseo, orbata fuit ; languor et debilitas inducitur ;  
appetitus

appetitus plurimum diminutus, tabes, lenta quidem pede progrediens, animus quasi moerore affectus, sitis inusitata, aliaque id genus.

MIRA admodum res omnibus familiaribus videbatur, tanta mutatio, tantaque infelicitas, absque ulla manifesta, vel etiam ipsi, causa semel suspecta. Diu latuit arcanum, et forsitan in tenebris semper remansisset, nisi forte fortuna, virginis pedisequa omnem ut se habuit rem mihi ambage verborum perquirenti clam renunciaverat. Quo satis compertum habui, dominam ejus, longo ante temporis intervallo, copiam theae tepidae inauditam sane, in usu esse bibendi: Praeterea, more suo, me certiores fecit, urinae reditum illius quam maxima auctum, adeo ut, sicut illa retulit, saepe hac via etiam lapsuros omnes in corpore humores metuit. His ita cognitis, haud difficile erat malo sic temere inducto obvium ire.

MEDELA, si non me fallit memoria, in eo omnino constitit, ut a poculis theae dilectissimis religiosissime imprimis abstinueret; deinde, in corroborantium medicamentorum, incrassantiumque omnibus horis perseveraret usu, cum exercitio corporis, modum non superante, quotidie usurpato.

HAUD mihi dicendum quid boni ea praescribendi ratio secum adferre valebat; non multo post enim mihi fuit demigrandi causa ex ea in aliam regionem; veruntamen, si a bona valetudine aegrae nostrae caetera mihi concludere licet, ne minime



dubius sum, haud parvo cum successu illam medicamentorum formulam adhibitam fuisse.

HANC veram Diabetis speciem satis manifestum videtur, mitissimi tamen nominis, non ulla humorum acrimonia, seu eruptionibus inflammatoriis, quibus nonnunquam hicce affectus stipatur, comitati.

AB historia jam tradita forte patebit, solum a debilitate, vel vasorum renalium laxitate, ortum ducere Diabetem; omne itaque quod vel hunc, vel illud efficere valet, morbum istiusmodi excitat. Sed a renum ductibus valde amplificatis, humoribus etiam urina densioribus data porta est, unde corpus arefcere et cito tabescere incipit.

Propter renum fabricae soliditatem, qua nullum aliud viscus in corpore humano praeditum forte est, satis constare videtur, per fistulas eorum arctissimas, humorem quam maxime fluidum naturaliter transfluere; unde liquide adparet ratio quare, majore lotio densitate donatus, per renum canales nullus transire valet humor. Ad hoc vero probandum, etsi non opus est verbis, explicatu tamen difficillimum forte invenietur, quomodo sit humores urina parum crassiores, vel magnopere ad fluorem vergentes, non per tubos hosce uriniferos transitum invenire. Hujus postremum memorati generis, sunt spiritus praecipue animales, ut nomen habent, quos ad eorum oscilla in sanguinis circuitu obla-

ros, nisi a natura lex quaedam constituta obftet, ob subtilissimam indolem, per haec vasa libere transmitti oportet. Hoc forte apud hydraulica quaerendum, vel alibi forte nusquam \*. His autem consentaneum est, particulas crassiores, aut magis ad gravitatem devexas, sanguinem conficientes, suopte pondere deorsum tendere; e contrario autem, has densas minus et ponderosas in aortae ramos superiores inclinare. Porro, alia quidem lege hydraulica constitutum est, particulas solidissimas, dum inter alias densitatis minus participantes usquequaque movent, recta semper linea, pro ratione in eas impressi motus antrorsum persistere: Compertum vero est, eam in recta linea directionem versus caput a corde esse; patet itaque, si quid in nostro sermone verisimilitudinis est, sanguinem versus renos descendentem minus spissum, seu ponderosum, et ex minimis particulis, mobilibus, nunquam non compositum debere. Hac viâ quidem, si tali hypothese indulgere licet, parum occulta forte causa est, unde fit, partes fluidiores in sanguine nantes, ad componendas urinam aptas, prae aliis visceribus, in locis superioribus, urinae vias petere, dum illae, eodem tempore, magis ad naturam subtilem devenientes, potius ad caput ascendere debent: Negari verò non potest, quod hae etiam in fistularum ora uriniferarum aditum habent, si quacunque ex causa, huc forte determinantur. Hoc plerumque,  
in

\* Vid. Boerh. praelect. cap. de renum struct. et usu.



in mulieribus hypochondriacis, contingere videmus, quibus, copiam usitatum maxime exsuperans, aquosae subpallidaeque profluvium est urinae. Hic fluxus urinae solito copiosior apud nonnullos nomine Diabetis designari videtur : Hunc vero affectum potius symptomaticum, quam morbum originarium \* appellandum judicamus : Pro causa enim agnoscit, ut in praelectionibus physiologicis, observatum habet noster eximius Professor Dr WHYTT, actionem vasorum renalium, a stimulo quodam, vel partium concensu, plus nimio auctam. Confitendum vero ingenue est, quod haud raro in illa aucta simpliceque evacuatione, si ita fas loqui, haud parvum spirituum, qui animales dicuntur, dispendium accedere consuevit, quo insensibili quidem gradu, debilis, nec non et tristis, evadit aeger miserrimus†.

QUANDO igitur tanta corporis debilitas, vel languor functionum devenit, tanta vasorum ineptitudo, a multis quidem causis praedisponentibus certissime pendens, ut secretiones naturales et succorum bonorum segregationes, quibus nutritur corpus, et sanitas conservatur, parum rite conficiuntur : Tunc humores per vasa circulantes, nec ordinem nec directionem, legibus hydraulicis constitutum, observant ;

\* Princip. Med. Franc. Home, pars 4. sect. 6.

† Hoc vero malum, saepe in praxi occurrendum, apud nos vernaculo nomine designatum, “ Lowness of spirits” aptissime appellari solet.

vant ; neque ab organorum secretiorum actione, eam conformationis illarum particularum, quam semper exigent, diversitatem habent ; potius vero tenuissima et homogenea indole, (tunc etiam temporis aliqua forte inquinatio suscepta) omnino gaudent. Porro hi liquores, siquidem in variis secretionibus perficiendis, debilitate summa in culpa, parum occupantur, innutiles corpori prorsus evadunt ; quare, auspiciis naturae, illum, quem casus qualiscunque fortuitus, sed praecipue consuetudo praebere solet, exitum postremo e corpore petunt.

Hic exitus via urinaria est, per quam semper humorum major est secretio, quam per ullum aliud organum secretorium, illis forte perspirationi subservientibus solum exceptis. Si hic vero inquiritur, quomodo fit ut humores adeo, ex iudicio supra stabilito, corpori inutiles, non potius per spiracula cuticularia quam vias urinarias defluantur, praesto forte est responsum ; quia, eadem causa quae debilitatem ac langorem corporis inducere, vim quoque organorum perspirationis propriorum similiter diminuere valet ; unde satis rationi congruens adparet, humores, qui maxime sunt ex natura fluidi aut dissoluti, propria gravitate impulsos, ad urinae vias quam alibi potius tendere, per quas, etiam dum sanitas viget, etsi quantitate parciores, adferri solebant.

Ex

Ex dictis forte patet, quod non a ratione longe aberrant, quibus autumare arridet, Diabetem esse natura quasi conamen ad se a quo laedi potest liberandam. Hoc porro vere dici potest de quibusdam febribus et aliis denique nonnullis morbis. Si enim quovis tempore in diabeticis fluxus subito cessat, symptomata satis cito injuriam corpori adferentia superinduci solent.\*

HACTENUS morbum quodammodo, sine auctorum sententiis ad nostrum auxilium vocatis, leviter tractavi ; nunc vero, in hac re adeo occulta et perplexa, ad eorum authoritatem certe me conferam maxime oportet ; felicem ter et amplius me deputabo, si forte fortuna, ad ex tenebris educendum quid lucis inde splendeat.

NULLUS fere occurrit morbus de quo opinionis diversitatem, sedis respectu, causae et methodi quam illa indicare videntur medendi, magis auctoribus amplecti arrisit quam iste jamjam tractandus : Etsi quam plures magnae equidem famae auctores, totis viribus, omnique ope a ratiocinio cadaverumque inspectione derivata, ejus naturam ac originem retexere nitebantur, nihilo secius tamen, adhuc forte omnia admodum incognita manent.

——— *causa latet, vis est notissima.* —— HOR.

Tramite

\* Nullo modo certus sum ex sententiis supra obiter expositis, explicari posse Diabetem: Forte sub formula judicari nequeant.



Tramite ab illis jamdudum presso itaque derelicto, quî eheu! potest quislibet, duce carens, vagatione se liberum continere? Et eorum vestigia sequentem, vix forsan ulla ratione penes tyronem hodieque est, viam a veritate monstratam adipisci. Quid itaque agendum? Nescio certe, si parum novae theoriae indulgere licet. Nihil verum a nostro proposito remotius. Sine experimentorum fulcimentis enim figmenta, ut ut pulcherrime disposita, cerebro excudere, nihil aliud videtur ac si quis omnibus nervis a recta via homines illicere, vel per ambages circumducere, operam daret.

In tali rerum statu itaque, quando nihil fere, quo minus mihi videar penso Academiae legibus mandato decedere, praeter hoc solum superest, ut uno aspectu auctorum de hoc morbo sententias ostendere conatus sum; id pro viribus lubentissime aggredior, unde quadantenus fiet, si in quibus eorum repugnantia plurimum consistit, retexere possim, ut via ad veram theoream aliis posthaec perquirentibus minus obscura forte evadat: Prius enim quam ad novas hypotheses fanciendas accingemur, nos quasi defectus veterum exploratos habere oportet. Hic sane primus est ad sapientiam gradus, et hunc  
itaque

itaque, haud quidem sine summo errandi metu urgere nunc incipio.

### C A P U T III.

## AUCTORUM ANTIQUORUM DE DIABETE SENTENTIAE.

NONNULLI, et inter hos quidem GALENUS \* Diabetem quandam hydropis speciem esse volunt, qua vero ratione haud pro certo habeo; negari non potest, in singulis ingentem aquae creationem adesse; sed hanc solummodo, inter ea ad similitudinem rite constituendam, parum valere, ex sequentibus forte patebit. Nemo ignorat, Diabetem in corpore etiam tunc temporis, quando nulla ad hydropem devexitas adesse censetur, existere posse; scilicet a calculo, in quavis renum parte seu viarum urinarum haerente; quum, actione vasorum secretoriorum musculari praeter naturam aucta, magis frequens et copiosior quam in statu adhuc integro urinae secretio fit: Idem, ut antea notatum, in malo hysterico, quando partium consensu admodum occulto, vis renum secretoria magnopere adaugetur, contingere solet.

HAUD

\* De locis affectis, lib. 6, cap. 3. Charter.

HAUD vero denegandum, ut nonnulli arbitrantur, hoc potius ad symptomaticum quam ad originarium attinere. Porro, ad hydropem faciendum semper forte necesse est, ut inter exhalentium et inhalentium vires ingens discrimen obtineat, quo fit humorum accumulatio, quod plus illa succorum quasi evanescentium exhalere quam haec caeteris paribus absorbendo assumere valent ; sed quod hoc etiam in Diabete contingit, nihil mihi praesto est argumenti, quanquam aliis haud difficile sit dictu. Praeterea, in qualiscunque nominis hydrope, si satis inveterato, nunquam non accidere solet ut in jecinore aliquid vitii adest ; saepissime quidem ab hoc solummodo, ut observatum habent, hydrops ortum ducat, simul atque immedicabilis plerumque evadat ; quod unquam vero immediate ab illo originem habet Diabetes, merito forte dubitandum. Jecore enim vitio tentato, haud captu difficile est, quod in aliqua corporis cavitate aquarum accumulatio erit ; effusionem vero supra modum per renum canales inde eventuram, nulla analogia, mihi saltem cognita, adhuc apparet, nisi alia certe causa in ea excitanda intercederet : Illa vero, qualiscunque sit, proxima est causa, nequaquam forte a jecinore male affecto pendens : quid hoc vero est in corpore humano peculiare, quod interdum potius ad renum canaliculos, quam ad membranam cellulosa aut aliam alibi partem, humores aquosos, in systema-



te magis quam fat est generatos, determinare pollet, admodum et cogitatu, et explicatu difficile est.

IDEM GALENUS, ad nostrum morbum excitandum, id vitium renibus ascribere vult, quo in lenteria primae viae afficiuntur, quibus tunc minus retinere, arripere verum ac transmittere celerius, contingit \* ; qua ratione autem stabilitur ea opinio parum certe mihi notum est. Lienteria frequens est alvi fluxus, ubi paululum ventriculi intestinorumque vi alimenta inveniuntur mutata. Pro causa organorum chylopoëticorum summam et debilitatem et relaxationem agnoscit, cum inertia seu defectu succorum, alimentis conficiendis quam maxime inferventium. Vitium itaque in lenteria ventriculi intestinorumque laxitas vel impotentia est. Et haud intellectu difficile est, quod variae quidem causae, in haec viscera immediate agendo, affectum istiusmodi procreare pollent ; nam illa corporis pars certe aliis interioribus citius ac crudelius afficiuntur. Quod vero ad renes attinet, longe aliter forte res se habet ; quando enim illi male sint affecti, alii systematis loci prius morbo laborent, oportet, id quod praecipue contingit, quando in humoribus eum inferens affectum, causa adesse censetur.

ILLUM quoque de hac re secuti sunt TRALLIANUS, ÆTIUS †, NICOLAUS PISO, ‡ et omnes denique  
longo

\* Vide loc. supr. cit.

† Vide Halleri disputa. tom. 4. p. 35.

‡ Lib. 3. cap. 35.

longo ordine hujus in rebus medicinalibus magistri sequaces.

ALII autem, haud ignoti nominis, hunc morbum a fervida renum intemperie gigni contendunt ; quomodo verum talis conditio corporis universa, qualis in Diabete semper obtinet, ab intemperie hujusmodi oriri potest, vix fortasse observationibus liquet. Qualis enim est haec callida intemperies? Nunquid prava ab origine partium conformatio, unde aequalis per vasa humorum circulatio perturbatur? Estne mollis renum structurae quaedam irritatio, a calculo in pelve aut allis lapidosi concretionibus impertita? Estne porro uriniferorum canaliculorum obstructio vel fartura, quas semper affectio inflammatoria sequi solet? vel denique, in fluidis parum in solidis latet arcanum, ab acidi salis seu alcalini, ignota effervescentia aut nimis praevalentia?

Si ab his vero, et ad haec spectantibus, principium hujusmodi intemperies minime deducat, ubi tunc invenienda? Et licet ad omnia pertineret, vix, ac ne vix quidem, medicus, ut ut peritus, inde Diabetem explicare potest.

IRREQUIETA est humanae mentis sollicitudo ad rerum occultarum principia causasque indeganda; neque vehementior, si rite versatur, aequo potest esse.

SED inde profecto, quoniam absque experimentorum adjumentis investigando plerumque occupatur, verae scientiae ingens jactura haud raro fit. Neque me ut molitorem haec prorsus agnoscit sententia,



tentia, fides enim ejus rei penes invenietur auctores ; quanquam in illorum de ea judicium manibus pedibusque discessurus, semper enim usu quotidiano comprobata forte est. Lapidum conflictu elici ignem videmus ; et quo vi majore alliduntur, eo magis semper scintillae splendent : De nostris verum theoreticis longe secus est ; nam ut labor et opus sese habent, ita obscuritas ac implicatio. Et haud sane aliter fieri potest, adeo ut eorum positiones nihil aliud quam cerebri figmenta, ingeniose quidem sed infeliciter disposita, videntur. Sic hominibus semper exitus non injuriâ erit, quibus sine rationis consilio nec non et experimentorum copia, qua minus in ora bonarum literarum audent pertinaciter ire, nulla religio est.

INTER has, de morborum natura et causis, quae a verisimilitudine magnopere recedunt, speculationes, illae ad nostrum malum spectantes, haud forte infimum tenent locum. Ex his vero figmentis, quandoquidem de aliis supra mentionem feci, perpauca sat esto hic loci commemorare, quod me remegio veloque, quantum in tractando possim, festinare oportet.

INTER haec autem, cujus praevalentia morbus eveniri ducitur, sal quoddam in humoribus merito deputatur ; quo efficitur, partes sanguinis crassiores, magis ad densitatem ac coagulationem propensas evadere ; has autem naturae tenuiores per proxima  
ostiola



ostiola et maxime patula necessario praelabi. Hoc verum procul dubio suum stigma secum fert ; et id quoque quod nunc in conspectum sese offert haud ei ab simile est : Referendo enim morbum, pro istius origine, ad spiritus quosdam, sine nomine et virtute, fermentatos, in sanguine aliisque humoribus interdum cohibitos, ad rem, adeo tenebrarum involucris tectam, perfecte explorandam nihil sane omnino facit.

UNDENE hi in sanguine spiritus fermentati derivantur dicunt ? Si per os vasaque lactea; tunc profecto omnes, quibus bibendo ex largioribus poculis parere cupiditati arridet mos, in huncce morbum plus minusve incedere oportet. Sed quod unquam ita res est, vel nuncubi in humoribus fermentationi quidquid simile adesse, perfecte ad redarguandum, haud forte tanti laboris sit, quanti videatur. Hoc vero amplius urgere proposito alienum foret ; praeterea de talibus sat jam dictum est. De aliis auctorum opinionibus, quibus plus verisimilitudinis accrescere videtur, nunc animus est differere.

CONTRA illam callidam renum intemperiem, supra memoratam, humores fortiter attrahentem; nonnulli potius facultatem hujus visceris retentivam, in Diabete esse, debilitatam, arbitrantur, cum ardore viscerum, praesertim hepatis ac lienis. Nullis vero argumentis, ut opinor, probare facile potest, quod renibus ulla retinendi facultas inesse solet: Ren est organum secretorium, ad eligendas e sanguine particulas,

culas, lotium composituras, effabre fabricatum ; sed quod repositorium cavernosum est, ad quendam humorem pro re nata continendum, haud dicere licet : Nam etsi cavitatem nomine pelvem renes habent, illa non ad retinendum, sed potius locum satis amplum prebendum, in quo, multis osculis patentibus, quidam tubuli, liquorem fluidissimum continuo stillant, aperiri solent, destinatur. Illa itaque opinio nullis adminiculis nâti videtur ; et quod ad viscerum ardorem pro causa adjutoria attinet, “ hic non est  
 “ causa, sed affectus morbi de quo agimus, qui sitem  
 “ inexplebilem fere, et febrem lentam hæticam in-  
 “ ducit, unde viscerum ardor.”

SENTENTIAM supra exploratam fovit SENER-TUS \* aliique. Proximo loco verum hi sunt, cum PLATERO †, qui a nonnullis febribus eum affectum in corpore relictum opinabantur, qui in humorum colliquatione consistit, et inde Diabetem premovere queat. Sed etiamsi, certis temporibus et statu rarissime occurrente, hoc forte contingat, in genere tamen vix potest esse causa Diabetis, absque ulla enim ad febrem devexitate, noster hic morbus plerumque occurrit.

## CAPUT

\* Lib. 3. de infirm. ventr. affect. p. 832.

† Prax. med. tom. 3. p. 751.

## C A P U T V.

AUCTORUM RECENTIORUM DE  
DIABETE SENTENTIAE.

ANTIQUORUM de Diabetis origine hae sunt maxime opiniones ; si vero ad recentiores nunc oculos convertere licet, non minus apud eos occurrit sententiarum discordia. Inter hos autem WIL-  
LISIUS\* pro causa contendit, cum rubris ac quasi fibrosis particulis, sanguinem conficientibus, sero-  
sas parum rite misturam subire ; cui accedit etiam HENERICUS REGIUS† aliique. Hoc vero, a quo inferri solet Diabetes, causa peculiaris minus rite aestimatur, pro origine enim, magna ex parte, morborum praecipue chronicorum illud agnoscere licet.

PROXIMO huic, THEODORUS ZWINGER tubolos lotium e papillis in pelvim effundentes, ex obstructione seu compressione, paralyticos factos esse autumat, dum interim renibus, ad secretionem in finibus arteriolarum rite efficiendam, debitus vigor inest‡. Si tubuli vero Belliniani paralytici redduntur, et, ad secretionem in arteriolarum extremitati-  
bus

\* Pharmaceut. rational. sect. 483.

† Lib. 2. cap. 13. p. 68.

‡ Theatr. Prax. med. sub litera D. p. 332.



bus promovendam, vigor adesse agnoscitur, ubi ista obstructio vel compressio, ad illum effectum in tubulis excitandum, existere censetur? Si affectione paralytica arteriolarum fines vexantur, facile creditu equidem est, istos etiam tubulos consensu pati. Quamvis vero concedamus, paralyse illos tentari, quid inde sequi oportet? haud profecto inter eos et arteriolarum extremitates, quid urinae mutationis in transitu eveniret; namque lotium forte intime ac perfecte compositum esse debet, antiquam ad *BELLINI* tubulos perventum est. Hi tubuli nihil prorsus officii prestare videntur, praeter quod, ab arteriolarum extremitatibus, fluorem sub urinae specie accipiunt, et deinde in pelvis cavitatem, per papillos guttatim assidue distillant.

*SYDENHAMUS* autem, omnibus aliis, in nostro morbo investigando, posthabitis, cruditatem feri non superatam causatur, egressum sibi per urinae vias perquirentis, quod, illo viro egregio iudice, facile obtinere potest, quando, a male tractatis intermittentibus ortus, ingens viscerum languor adest\*. In quibus vero consistit ista feri cruditas, nos minus sane certiores facit. Praeterea, ob imbecillitatem si viscera in culpa fuerint, potius forte, quam Diabetes, inde nasci debet diarrhaea, aliaque id genus. Neque porro, unumquemque uberriorem, post in-

termittentis

\* *Prax. med.* p. 357.

termittentis singulos paroxysmos, seu integra remissione suscepta, reditum urinae crassum ac subinde sedimentum fundo deponentis, aestimari licet Diabetem; hunc, duntaxat per paululum temporis urgentem, pro critica evacuatione haberi oportet; maxime itaque a norma discedit qui illud malum originarium appellari vult.

PROXIMUM auctorum ordinem accipit LISTERUS. Quod in Diabete renes praecipue afficiuntur ille minime concessum dat, potius pro causa vehementem stomachi ac intestinorum quasi ardorem habet, quo fit, potus crude assumptos subito valde diureticos fieri, et tale spiritus vini, &c. inferre posse contendit\*. Quid statuere vult usurpando vocabulum ardore? Si stomachi intestinorumque ardore istum effectum ab haustu spiritus vini productum intelligat, memoria tenere oportet, illud duntaxat fugitivum esse, et forte ad morbos gignendos vere diuturnos omnino impar. Praeterea parum forte adhuc confirmatur, ardorem, citra quod salus postulat, in quacunque corporis parte per aliquid temporis existere posse, ubi nihil obstructionis aut inflammationis adesse judicatur.

INTER eos quoque auctores qui de nostra aegritudine sententias exponunt, sequentem tenere videtur BOERHAAVIUS, quod Diabetes, solum urinae multo chyli repletae, crebra ac superabundans est trajectio, causamque istius positam esse vult in ni-

E

mia

\* Exercit. Med. de Diabete.

mia arteriarum urinariarum flacciditate, ab humoribus admodum dilutis et aquosis proveniente\*. Si arteriolae verum urinariae adeo relaxantur, ut per eos libere transitum chyli particulae habent, nullo argumento comprobari facile potest, quod rubri etiam sanguinis globuli egressum non adipiscantur: Praeterea, haud raro contingit, imo plerumque, quod urina Diabeticorum omnino tenuis ac limpida, speciem aquae prae se fert, ne vel minima lactis parte impregnata, etiamsi deinceps in vetustatem morbus incideret. Hoc omnibus facile patebit, ut nihil de eo fusius dicam, quibus, argumento videndi, hicce morbus satis innotescit, et cui nunquam aspicere occurrit, eum alte radices agentem, ille in hac re aequus parum iudex est.

Huic in opinione succedit † SILVIUS de le BOE, qui pro causa habere videtur, sal quoddam volatile, globulorum sanguinis vel aliorum humorum crasis, dissolutionem intime faciens‖. Sed quod tale adest in sanguine sal, neque ab illo confirmatur, neque unquam forte confirmari poterit.

POSTREMUM itaque auctorem ad usque pervenimus, quem hic loci memoratum habere opus est; labor enim infinitus esset, omnes confertim enarratos

\* Instit. Med. § 824.

† In nostro scilicet ordine, quoad tempus enim quando auctores inchoarent, forsan subinde secus est.

‖ Oper. tract. 5. de Cachexia.



narratos aducere; nec mihi videor navasse operam, mentionem fusius de aliis faciendo. Hic auctor est JUNKERUS, cui opinio haec arridet, quod, ut fiat Diabetes, ingens excretoriorum motus vasculorum turbatio fieri debet; quo fit, non serum duntaxat, verum lymphæ etiam, a liquefacta pinguedine derivata, ad ductus uriniferos magno impetu protrudantur\*. Si talis vero enormis excretoriorum motus vasculorum agitatio seu turbatio (ut ille habet) agere conceditur, necesse forte est, ut in auxilium aliquid prope renes stimuli revocamus, talem affectum istis in partibus efficere aptum, si de eo nobis confirmandi desiderium est. Et simile quidem contingere cedamus, a calculo ipsis in renibus, vicinorum viscerum ulceratione, vel inflammatione, spasmus, inexplicabili affectionis hystericae sympathia, aliisque id genus; sed quod haec saepe occurrere reperiantur, ex mortuorum dissectione, seu fideli, in aegritudinis progressu, symptomatum iudicio, haud mihi constat: Satis quidem compertum habemus, quod eruptiones inflammatoriae, a feri acrimonia ortum fortasse ducentes, interdum Diabetem comitantur; notandum vero volumus, ea potius morbi diuturnitatis consequentia esse, quam ejus causae efficientes†.

Huc

\* Conspect. Med. tub. 100. § 4. cap. 3.

† Haud forte opus est hic loci memoratam habere quandam doctissimi Mead, de causa Diabetis, opinionem singularem, quam in jecinore positam esse vult.

Huc usque, ut penes me erat, sententias scriptorum, de hoc morbo, varias quidem ac inter se discrepantes, molli brachio percurri, et in earum singulis aliquid erroris leviter notatum habui; in eodem vero genere, in quo et ego offendo, alios forte reprehendere audeo; et praeterea, etiamsi causae ab illis allatae, magna ex parte, ad nostrum morbum efficiendum, minus accommodatae videntur; haud tamen inficias ire queo, quod subinde etiam singulae earum huic aegritudini ansam dare pollent; ab hac verum vel ab illa, omnibus aliis sine discrimine exclusis, nasci, id quod earundem fautoribus maxime arridet, nequaquam sane concedendum puto \*

His itaque sententiis quodammodo excussis, restat proximo, ex quibus vere originem trahit Diabetes, enodare dem operam. Hic labor, hoc opus. Quando enim auctores, magna equidem famâ inter se

\* Neque hic, neque alibi, quod vere dici potest, me ulla verborum acerbitate, in sententiis auctorum redarguendis, vel more ratiocinandi protervo usum esse, haud mihi levissima spes est. Nihil sane, ergo studiorum magistros, licet etiam illis, ob naturae imbecillitatem, aliquid erroris haud immerito forte affigendum, magis dedecet tyrones, quam acies flyli arrogans: Nihil denique vitium ingrati animi adeo designat; praesertim quando memoria tenetur, utpote notatu dignissimum, quod, si forte fortuna quid nobis doctrinae inest, omne id admodum jure illis adjudicandum: Talis utique gerendi ratio nec ingenium nec animi magnitudinem offendit, sed urbanitatis aequae ac prudentiae expers omnino habeatur.

se de hoc affectu minime consentiunt, quâ a me in rebus medicis quam par est minus heu experto expectandum, quod de illo vel dilucide vel congruenter differre possum? Magna quidem curâ, ac omnibus firme scriptoribus, quibus mihi inferre manum contigit, de hac re iterum ac saepius evolutis, animum ad hunc morbum rite explicandum adhibui; adhuc vero parum cum successu. Neminem eorum attigisse veram illius naturam, etsi symptomata progressumque satis convenienter descripta reliquisse, mihi videtur. Hoc vero illis pro culpa minus inferre licet; magis forte evenit, quod mihi ingenii acies admodum hebet. Nihilominus verum, adeo rarus est affectus, ut illis eum accurate indagandi deerat copia: De causis autem remotis ac praedisponentibus, diagnosi, ratione symptomatum, prognosi et medendi methodo, ut apud eos fideliter satis traduntur, nunc animus est agere.

## C A P U T VI.

## D E F I N I T I O.

DIABETES urinae aquosae, pallidae, subsuavis ac interdum caenosae est profluvium, magis frequens copiosiusque, cum siti insolita, quam in statu integro. Hac definitione, ut ait BOERHAAVIUS, apte dici potest



potest, arterias emulgentes accurate earum nomine congruere ; ea enim vasa, sub chyli vel potius feri larva, totum corpus nutrimenti quasi emulgent.

## C A P U T VII.

### A B A L I I S D I S C R I M E N.

FACILE ab urinae incontinentia Diabetes distinguui possit, in illa enim, absque studio voluntario aut vi respirationis ; in hac vero, amborum consensu, emissio contingit : Illa denique, a fibris vesicae sphincteris remissis vel paralyticis redditis, ortum ducere ; haec autem ad universum corporis statum forte vel fluidorum solidorumque temperiem, potius attinere videtur.

## C A P U T VIII.

### V E R A A S P U R I A.

IN quibus autem vera a spuria differre solet, ex sequentibus forte patebit. In spuria vel symptomatrica non adest illa sitis insigniter urgens, cui vera species nunquam non consociatur. In illa praeterea, non auctiore quantitate constanter prodit lottii fluxus, sed tantum, ob viarum urinae obstructionem, insigniter accumulari solet, et deinde, si forte

forte fortuna ductus urinarii iterum relaxantur, ingente copia statim magnoque impetu, irrumpitur \*. His denique addere licet, quod in spuria non calor urens adest, et lumborum tensio, cum dolore quodam per intervalla pungente, qui a costis spuriis, in vera, ad scapulas usque haud raro extendere consuevit †.

NOSTER vere eruditus Professor Dr WHYTT, sermone mecum usurpato, de hac re observatum habuit, se post aegritudinem naturae febrilis tarde convalescentem, fluxu urinae longe magis solito abundante, per aliquot septimanas laborasse. “Hunc” recte notavit “Diabetis esse speciem, sed potius tenuem sive spuriam quam veram. Idem in variis aliis aegris, a morbis longioribus convalescentibus, simile urinae profluvium observavit.”

AD eandem finem etiam attinere videtur, quod memoratum in commentariis suis, habet nobilissimus VAN SWIETEN. “Duplex ergo possit distinguui Diabetes; una per quam tenuis urinae ingens copia excernitur, potum assumptum aequans vel et superans: Altera, quae urinae quidem auctam copiam habet, verum simul cum illa exeunt crassiora, sive ex colliquatione partium corporis nata, sive ex chylo vel lacte, ex ingestis parato, cum

\* Hoff. cap. de Diabet. loc. cit.

† Albert Haller. disput. tom. 4. de Diabet.

“ cum sanguine fluente, et una cum urina per rena-  
 “ les fistulas elabente \*.”

CARDANUS, de superiore Diabetis specie agens, affirmat, se quadraginta annis insolito tali urinae profluvio laborasse, sine ulla vel ad contabescendum vel sitiendum proclivitate, adeo copioso, ut singulis diebus centum uncias emittere solitum esse. †

POSTERIOR autem species, simul cum urina ingens quidem chylosi vel serosi humoris copia, quo nutrimento orbatur corpus, et inde contabescit, irrumpitur; quamquam illa rarior, summum perfecto periculum habet.

“ QUAMVIS autem naturaliter per fistulas rena-  
 “ les chylus, vel lac cum sanguine fluens, tran-  
 “ sire non videatur, tamen non adeo insolitum est,  
 “ in urina simile quid invenire, in sanis etiam homi-  
 “ nibus. Vidi aliquoties in me ipso, aliquot post  
 “ pastum horis, et imprimis post validam deambu-  
 “ lationem, largiori prius jentaculo sumpto, uri-  
 “ nam, quae turbida et lactea erat, ipso momen-  
 “ to dum mittebatur, et statim album, et chylo si-  
 “ millimum, sedimentum deponebat. Postea et in  
 “ aliis similem urinam aliquoties observavi ‡.”

HAEC observatio hujus illustrissimi auctoris, eorum opinionem quodammodo comprobare videtur, qui, pro causa Diabetis, renum laxitatem cau-  
 san̄tur;

\* Tom. 11. §. 662,

† De vita propria cap. vi. tom. 1. pag. v.

‡ Van Swieten comment. loc. cit.



fantur ; a valido enim exercitio post pastum praecipue, efficitur, ut sanguinis motus valde excitetur, quo vasorum capacitas amplificari debet; unde humores, qui adeo magnopere agitantur, canaliculos, haud illis naturaliter accommodatos, intrare valent ; multis praeterea ramentis, a vasorum minimorum superficie detritis, quo turbida devenit urina, et color quasi lacteolus ei conciliatur : Quaecunque itaque causa, ad renum laxitatem continuo efficiendam, in corpore latet, talis in humorum circulatione turbatio, aut et error in segregatione, semper sequi debet, qualis in diabeticorum urina crassa, chylum referente, et solito auctiore, nunquam non contingere videmus. De his vero hic loci sat dictum est ; alia tractanda sese in conspectum offerunt.

## C A P U T IX.

## C A U S A E R E M O T A E.

OBSERVATIONUM scriptoribus credere consentaneum est, quod viam huic morbo sternere solent, medicamentorum diureticorum abusus ; acidularum aquarum, praecipue frigida tempestate ; animi affectus nimii ; febres imperfecte solutae arden-  
tes ; V. S. et catharticis male tractatae intermitten-

tes, praecipue in senibus ; ulcera prava subito occlusa ; morbus aliquis acutus, in renibus firmatus, ac ibi per crisin quasi malignitatem suam deponens ; mensium obstructio ; venenum aliquod deleterium, ex eorum genere quae vesicam et renes infestant, quale est quod a Dipsade \* funditur ; quibus forte addi licet, feri acrimonia et tenuitas †.

HAEC causae etiam sensibus nostris facile satis apprehendi possint ; quod vero ad proëgumenas attinet internas, longe aliter forte res est : In hujusmodi morbo uti in multis aliis, observari liquet, quod renum habitus singularis duntaxat efficere vix possit, nisi totius humorum systematis quaedam temperies cooperetur, quorum consociatione, oblata tempestate, causa etiam proxima nascitur.

## C A P U T.

\* Dipsas autem reptilis fera, si quem percusserit, sitem non ferendam accendit ; isque copiose bibit, neque siti medetur, sed ventrem obruit humore. Aret. Capp. morb. diu. l. 2. c. 2.

† Nic. Piso. lib. 3. cap. 33.

Hild. cent. 5. observ. 53.

Schenck. observ. med.

Lister. exercit. med. de Diab.

Syden. prax. med. 357.

Joan. Philp. Metz. Diab. obser. rar.

Home prin. med. pars 4. sect. 7.

Aret. Capp. morb. diu. loc. cit.

## C A P U T X.

## D I A G N O S I S.

Quod ad signa concomitantia pertinet, qualia apud auctores recentiores confirmata reperiuntur, nunc recensere in promptu est. Inter has vero notas intelligitur, potionem non longo post assumptionem tempore, nihil fere mutationis inducentem, immodica quantitate, per vias urinarias emitti; sitem, nulla remissione efficientem, quam nihil fere quod hauriatur compescere valet; \* potum magna etiam copia assumptum, quam quod meiando prodire solet, parciolem; † ventrem aridum, caloreque quodam mordace efficientem; praecordia item gravia; testes, maximeque pedes, leviter intumescetes; os siccum, salivam spumofam, albamque exhibentem; spiritum quasi urentem; dolorem, nescio quodque etiam prope costas spurias simile quadatenus tensioni.

De potu nihil mutato per renes reddito, sic in sequentibus observatum habet GALENUS; “ Supra  
“ modum

\* Potus enim avide renibus attrahi videtur, priusquam scilicet in ventriculo, ob summam istius organi imbecillitatem, coctionem satis susceperit.

† Hoc modo totum corpus consumi, liquefcere, ac quasi in aquam resolvi incipit: Hac via etiam, non solum feri, sed item humoris solidarum partium subtilioris exugere solet.



“ modum sitientibus infirmis, atque idcirco affa-  
 “ tim bibentibus, celeriterque per urinam reddentibus  
 “ epotum tale, quale biberant \*.”

“ AT vero recte jam notavit LISTERUS, ARE-  
 “ TAEUM, qui GALENO vetustior est, rectius  
 “ hunc morbum descripsisse, neque in ejus historia  
 “ hanc qualitatem urinae, assumptis respondentem  
 “ referre †.”

“ QUANQUAM LISTERO non concesserim, nun-  
 “ quam hujusmodi urinam in hoc morbo prodire:  
 “ Refert enim BARTHOLINUS, seipsum ex calculi  
 “ tormentis, aliquando in Diabetem incidisse, vi-  
 “ numque Rhenanum epotum per urinam rursus  
 “ reddidisse, ita ut pro vino ipso, harum rerum  
 “ ignoro, potuerit propinari. ‡ Si igitur omnes  
 “ observationes examinemus, apparet certe, ad  
 “ urinae insigne profluvium||, verum diabetis ca-  
 “ racterem redigendum esse, ‡

## C A P U T

\* De loc. affect lib. 6. cap. 3. Charter.

† Cent. 1. observ. 63.

‡ Exercit. med. Diab.

|| Copia urinae tam ingens aliquando est, ut vix fide digna videtur, scilicet singulis diebus circiter libra sex et triginta, vel, ut nonnullis placit, quadraginta, urinae excernuntur (a), vel denique aliis (b) quinquaginta, etsi singulis diebus, ex potu ac cibo, non plus septem vel octo libris assumptis.

‡ Vid. Joan. Philp. Metz. obs. rar. de Diab.

(a) Cardan. de variet. rer. lib. 8. cap. 44.

(b) Donenacus observ. med. cap. 32.

## C A P U T XI.

## R A T I O S Y M P T O M A T U M.

DE symptomatum ratione nunc tractare conabimur. Fluxus urinae insolitus, ac potus ingesti copiam exsuperans ab alterutro sequentium oriri debet; vel a viis urinariis ipsismet, magis quam par est, amplificatis; quo fit, ut liquores maxime tenues, minorum resistentium solito occurrentes, nullo cum molimine transire valeant; et his libero cursu rapide transmissis, ad alios fluores, huc etiam properantes, in eisdem ramulis, dum sensim sensimque aperiores fiant, late patet via: Sive a virium renalium nervis alicujus corporis partis, affectione morbosa tentatis, respondentium, vigore insigniter aucto; vel quadam sensibilitate variis modis suscepta hujusmodi symptoma ortum habeat; quod in malo hysterico liquide forte constat, cui solito copiosior, a concordia nervorum, aut motu vasorum minimorum oscillatorio, admodum aucto, urinae secretio fit: Vel denique, ad sanguinis dissolutionem, aliorumque humorum colliquationem, hujusmodi urinae diluvium referendum esse, omnino verisimile videtur. In hoc morbo enim, lotii effusionem plerumque liquidorum ingestorum copiam maxime excedere, fatis novimus; si vero sanguinis dissolutio cum aliis

aliis forte causis, non cooperetur; unde ne id fieri potest? Nulla ratione quidem, si ab aëre circumfluente, per vasa inhalantia, majorem aquae copiam, nunc quam in sanitate, corpus accipere non solet.

“ Quemadmodum enim, ob insolitam humorum  
 “ tenuorum excretionem per renes in Diabete, va-  
 “ sa cutanea exhalantia parvam humoris perspira-  
 “ bilis copiam eructant; sic ob eandem rationem,  
 “ vasa inhalantia solito longe avidius aëris humidi-  
 “ tatem arripient.”

AD pallidam ac insipidam urinae, in hoc morbo naturam quod attinet, haud facile explicari potest. In sano homine, ex aquosa-terrestri-salina-oleosis partibus, urina constat; a sale et oleo, saporem, odorem, coloremque induit; sed in ea, majore copia caeteris, adest aqua: Ex nonnullis experimentis compertum est, quod urina, e papillis uriniferariis, in pelvem immediate distillans, nihil sedimenti, nihil fere odoris habet: Porro, etiamsi agnoscatur eam sal acerrimum, oleum praeterea volatilissimum, et terram denique tenuem, ac valde attritam, continere; nihilo secius tamen, donec diu in vesica retinetur, principia haec constituentia adeo sub aquae specie larvantur, seu aquosis particulis tam copiose diluuntur, ut deprehendi vix queant: Haec lymphæ deinceps, quamvis insipida prius, lenis, inodora, ac coloris fere expers, morae autem in viis urinariis diuturnitate,



tate, rubicundior, coctior, longe parcior, falsior, faetidior ac acrior fit ; in quibus remorans, partes ejus aquosas, per absorptionem magna ex parte amittit, quo fit, citra dubium quod caetera elementa remanentia, ad nostros sensus magis deprehensibilia evadunt. In nostro autem morbo, urinae secretio, et per omnes fere ductus urinarios, tam subito perficitur transitus, id quod a fistularum laxitate, ac humorum contentorum tenuitate pendit, ut tempus ipsum, quo fluidissimarum particularum absorptio fiat, deesse oportet. Praeterea, haud a verissimilitudine obsonum videtur, quod tali in casu etiam, vires absorbentium omnino languant vel minuantur, adeo ut, ad sua officia peragenda, ne vel minime valeant. Denique, quando in memoria tenetur, ex humoribus valde et diu attritis, ut et deterfis solidorum partibus, oleum nasci, cum salibus, renixu vasorum musculari similiter exaltatis ; manifestum forte erit, hac re paulo amplius examinata, si vis in tunicis vasorum remanens, quae, pressione propria in humores ac elasticitate, eorundem semper attritum, seu elaborationem efficit, unde oleum salesque, ut supra notare licuit, et ex his rursus color saporque urinae, generantur ; si haec itaque vis, impetu ac diuturnitate morbi, adeo debilis languidaque devenit, ut ad hujusmodi attritionem efficiendam, nihil omnino valet, per inductionem colligere facile potest, urinam  
vere

vere insipidam, qualis in diabete exit, et vix colore praeditam, prodire oportere.

IN hoc malo etiam, urina aliquando lacteum, sed raro, inducit colorem. Hoc a summa debilitate, et ad globulos sanguinis rubros conficiendos, totius vasorum systematis ineptitudine, contingere potest; quo fit ut chylus, male etiam ob vim organorum chylopoecorum valde diminutam, confectus, nullam fere admissionem renixu vasorum, vel denique, cum massa sanguinea assimilationem, subit; sed exinde, ad vias urinarias, nihil adhuc mutationis suscipiens, subito trajicitur; in qua etiam aliquid dulcedinis nunquam non percipi solet.

RATIO qua in diabetis dulcessit urina, minime a difficultate remota est; praeterea, de hac re magna apud auctores sententiarum diversitas invenienda: Namque pro signo diabetis pathognomico, etsi haec dulcicula urinae indoles haud immerito omnibus habetur; quando verum de hujus phaenomini origine loquimur, plus minusve semper difficultatis in eo investigando, nobis obstat. Ad defectum salis, qui semper in aquosa bilis parte adesse oportet, recurrit doctissimus MEAD, tum etiam notans, bilem, si non adest illud sal, aliquid dulcedinis suscipere. Apud WILLISIUM \* quoque, KEILIIUM †, aliosque diversas, de hac re, quasdam

opiniones

\* Pharmaceut. rational. § 483.

† Tentam. med. phys. tentam. iv. pag. 121.



opinionones mihi contigit legisse, de quibus, ut amplius loquar, haud opus est. Sufficiat hic loci notatum habere, quod nullis experimentorum fulcimentis niti videantur.

Ad hanc rem aliquantenus enodandam, necesse forte est, recordetur, quod ille urinae sapor ad dulcedinem accedens, tum solum, vel plerumque adsit, quando color quasi lacteus \* in eo discernitur. Ex observationum collectoribus constat, quod minimum est discriminis inter illum liquorem, ex alimentis confectum, et eum proprio nomine lac dictum: Porro, ex chymicis satis confirmatum habemus, quod sal lactis essentiale, quodam processu praecedente, nescio quid praebere soleat, quod ex sua indole parum a saccharo differt. His omnibus itaque concessis, haud explicatu difficile sit, unde in diabeticis urinae sapor dulciculus; praecipue si in hujusmodi sale vis chyli nutriens poni licet. In hoc autem morbo conceditur, corpus gradatim tabescere potius, quam ex alimentis nutrimentum capere; itaque sequi oportet, id quod corpus fovere debeat, perpetuo latice ad glandulas renales, ibique saporem dulciculum urinae conciliantem, derivari.

G

DE

\* Quasi lacteus; nam verus color lactis rarissime, si unquam occurrit. Bis vidi veram diabetem, sed urina aegrotorum ne vel minime albescente.



DE fitis origine, in hoc malo, sic scribit GAL-  
 LENUS, “At vero ingentis fitis, citra diabetem,  
 “causa est ventriculus, aut calida, aut sicca, aut u-  
 “traque intemperie affectus, maxime vero os ip-  
 “sius; proxime ventriculo hepar, sed maxime pars  
 “ejus sima, simul cum ea exaestuantibus nimirum  
 “mesenterio, &c.” \* Os siccus, saliva spumosa,  
 et fitis, pro causa habent, ut videtur, sanguinem  
 fluidissima parte privatum, ex ingente per renes  
 fluidorum dispendio, quod vix incredibili hausto-  
 rum numero compensari potest. Sanguis noster,  
 ut prius notatum, prae aliis partibus eum compo-  
 nentibus, maxime ex aqua constat; ad libe-  
 ram ejus per omnia quaecunque vasa transmissio-  
 nem, necesse est, illam in eo semper adesse; si  
 verum ista sanguinis fluidissima pars, per quamvis  
 auctam evacuationem, plus aequo e corpore exeat,  
 tunc temporis salivæ, muci, aliorumque id genus,  
 secretiones, pari ratione minui debent: Pro axio-  
 mate enim in oeconomia animali habetur, quod,  
 quanto quævis secretio auctior fiat, tanto, caeteris  
 paribus, reliquæ omnes diminutæ evadant. Sic  
 in diabete ingens liquidorum, tam excrementitio-  
 rum, quam nutrientium, per vias urinarias, subest  
 evacuatio; qua ratione fit, quod varii corporis lo-  
 ci, succis humectantibus, nec non et particulis sub-  
 tilissimis, ad eorundem nutritionem aptis, spolien-

\* De loc. affec. lib. 4. tom. 7. Charter.

tur; et inde porro, os, ventriculus, intestina, &c. sicca aridaque fiant, et ex his denique pendens sitis etiam molestissima. His forte addi licet, quod haud raro hunc morbum, acrimonia quaedam humorum comitetur, ad quam compescendam, aut diluendam, auspiciis naturae providentis, semper sitis excitatur: Praeterea haud inficias ire videntur, quod nonnunquam, ad abluenda, sive detergenda, quoties viscera abdominalia infestant, quaedam prava ulcera, a quibus interdum pendere nostrum morbum agnoscitur, conamen salutare sitis est. Sed saepe, ad eum finem promovendum, ne vel minime profunt ingentes etiam potuum haustus, quo plerumque fit ut morbus ad mortem usque exacerbeschere pergat.

Praecordiorum rosio, quae interdum hujus morbi comes est; dolor prope costas spurias; sensus in membris visceribusque ardoris; spiritusque quasi urens\*; ad membranae communis, ventriculum, fauces, oesophagum, &c. involventis, statum quandam singularem, a siccitate pendentem, pertinere videntur: Dolor etiam ad costas spurias, nunc

urgens,

\* Hoc symptoma, haud apud auctores inveniendum, in nosocomio regali occurrit mihi, inter scribendum, opportunitas videndi; qui hodie hospitium ROBERTO BAILLIE diabetico praebet. Primum impetum diabetes in eum fecit, sicut ille refert, absque ulla alia causa sibi cognita, post ingens susceptum frigus, quod non autem inter causas diabetem inducentes recensitum habetur.



urgens, deinde per intervalla cessans, pro origine ad eundem membranarum nervosarum nisum tensivum adspicit; qui oriri quoque deprehenditur, quando menstrui sanguinis excretio praeter naturam aucta est; quo in casu dolores saepe intolerabiles, ad os sacrum et inguina, excitari solent †.

LUMBORUM, testium pedumque intumescencia, a solidis labefactatis, effici videtur. Hoc symptoma, inter hydropem nostrumque morbum, parum discriminis intercedere docet; quod omnes ferme scriptores facile agnoscunt, et eandem denique, atque in illo, explicationem habere volunt.

Ex hoc malo defunctorum inspectione, nihil fere insigne reperitur, non sine spei nostrae magnae quidem frustratione: Certe enim tam gravissimo malo quando extinctus est homo, nulla medicamentorum formula contra ejus impetum praevalente, haud parvam expectationem sustinere solemus, cum ad disseccandum detegitur cultellus, in renibus ipsis, vel alia denique vicina parte, alicujus vitii notabilis deprehendendi: Nihil veroplerumque minus.

In memoria autem teneri oportet, etiamsi, vita ad huc surperstite, et dum vehementer morbus urgebat, viis urinariis, quam maxime relaxationem ac amplitudinem adesse; eandem vero, sub mortis frigore vel integra affectus remissione, parum expectandam; quibus fit, siquidem nihil amplius distentionem seu amplitudinem.

\* Joan. Philp. Metz. obser. rar. loco citato.



amplitudinem urgeat, magis angusta et contracta evadunt vasa.

VERUM etsi, in plurimorum hoc malo extinctorum, renibus vel alibi haud aliquid vitii se ad sensum notabile offert, ex paucorum tamen observationibus, constare videtur, renes cujusdam Diabetici, aliquot annis eo malo laborantis, non quidem effoetos, sed solito flaccidiores, nec rubri, verum potius cineritii coloris repertos esse \*. Sic quoque ex Diabetis spuriae causa, qua calculosa concrementa vias urinarias obstruxerant, in veram Diabetem incidit quidam comes, qui, alio morbo graviore defunctus, et postea secatus, ureterem dextrum insigniter et farciminis instar expansum, quin ejusdem lateris renem, in molem duplo majorem elevatum, ostendit; uti de nostro morbo verba faciens, observatum habet FRANCISCUS HOFFMANNUS †. Sed rem minime confirmatam reliquerit ille literatissimus vir, utrum istius morbi graviore, sive Diabetis, phaenomena haec abnormia consequentia esse.

## P R O G N O S I S.

Hoc malum chronicum itaque, ut ad prognosin veniam, cum adhuc recens curari debet, utpote si

\* Pet. Pawi, observ. anatom.

† Consult. med. tom. 2. § 3. cas. 85.

in vetustatem incideret, aegre sanatur; corpus, ut prius dictum, liquefcere, atque marcore consumi incipit \*. In bibacibus, ac senibus, nunquam fere medelae auscultat †. Aliquando in febribus ardentissimis accidit hic affectus, et tum quidem nulla arte ei medicus obvium ire potest. In multis medicorum opprobrium manet, propterea quod, magno cum negotio detegi queat; dum incipit, et sensim sensimque ad incrementum pergit, nulla adhuc mutatione corporis inducta, aegre deprehenditur; donec acmen tandem attigerit, et tragedias suas sub larva ludere definerit; quo tempore facile percipi licet, adeo ut ex improvviso sane induci videatur. Praeterea, quo plures oeconomiae functiones, in suis officiis rite peragendis, laeduntur, eo pejor ac infaustior semper evadit; id quod in Diabete saepissime reperitur; morbo sane, ex sua indole, refractario, et qui subito aegrotum e medio tollere potest. Sed videtur, tabem plerumque tragediae finem imposituram ‡.

His omnibus itaque, nam verborum multitudine supersedeendum est, quodammodo peractis, nunc ut de medendi methodo pauca adjiciam solum restat.

## CAPUT

\* Lomm. med. obser. lib. 3. de Diabete.

† Home Prin. Med. loco citato.

‡ Joan Philp. Metz. loco citato.



## C A P U T XII.

## M E T H O D U S M E D E N D I.

Non magis torquentur auctores inter se, dum toto coelo discrepant, ut nostri morbi causam, indolem, et signa quoque ab aliis discriminantia, uno sub aspectu exhibeant, quam in methodo medendi proponenda. In tanta itaque, de hac re, opinionum contrarietate, ut certam stabilemque sanandi formulam, quae ad universa hujus affectus stadia feliciter exhibeatur, instituere possim, haud jure expectandum est: Praeterea, omnes medicamentorum formulas, contra hunc morbum, a singulis auctoribus luculenter laudatas, ut certa ordine classibusque discretis ponam, et infinitae et inutilis esset operae. Sufficiat igitur hic loci, ea molli brachio praecurrere, quae, uno ore, volunt praecipuum tenere locum.

Si verus vel chronicus est morbus, indicationes curatoriae videntur esse, deattemperationem succorum, sanguinis cohaesionem seu invigorationem, cum solidarum partium corroboracione, tentare \*. Omnia haec perficiuntur, remediis temperantibus, refrigerantibus, corroborantibus, mucilaginosi, incrassantibus, et balsamicis. Inter haec sunt decocta ex althea, gelatina, lac coctum, ichtyocolla, gummi

\* Joan Philip, Metz. de Diabet. obser. rar. loco citato.



gummi Arabicum, oryza, pisces testacii, fago, emul-  
siones ex amygdalis dulcibus, pistaciis, et semini-  
bus papaveris albi, tragacantha, et quae sequuntur  
medicamenta.

CELSUS totis viribus contendit, quod aeger ab aquo-  
sis diluentibusque religiosissime, et ab omnibus deni-  
que quae urinae fluorem promovere valeant, abstinere  
debeat\*. Ad eandem opinionem accedit PAUL. E-  
GINETUS, et magna equidem medicorum caterva†.  
Nonnullis, in astringentibus spem curationis ponere  
placet‡: A quibus vero multum dissentiunt, WIL-  
LISIUS ||, ARETAEUS\*\* JUNKERUS ††.

ARETAEUS, in loco citato, sic scribit, “ Sin au-  
tem, vel parum temporis a meiando abstinuerint, in-  
tumescent lumbi, testes et ilia; quumque remiserint,  
lotium quidem calefactione profundunt, tumidae vero  
partes detumescent.” Ad quam observationem cor-  
roborandam, verba JUNKERI, quae sequuntur, addere  
licet, “ Astringentia, si in Diabete, ad fluxum cohi-  
bendum, adhibeantur, viscera vehementius constri-  
gunt, tumores lumborum, immo ascitem et mortem  
accelerunt.” ||| Sed alii quidem, et forte non imme-  
rito, eorum sententias parum fovere videntur.

NONNULLI

\* Lib. 4. cap. 20.

† Eginetus de re medica, lib. 3. cap. 45.

‡ Shaw's practise of Physick, part. 1. pag. 25.

|| Pharmaceut. rational. § 4. cap. 3.

\*\* De sig. et caus. diuturn. morb. cap. 2.

†† Conspect. med. tab. 100. § 4. cap. 3.

||| Loco supra citato.

NONNULLI ad curationem perficiendam, balneum frigidum commendant, quod optimos quidem effectus praestare valet, quoniam vasa omnia, et humores ad dissolutionem propensos compingit\*. Serum aluminosum, apud alios, pro specifico habetur. Opiū praecipue, manu prudentis medici adhibitum, magni aestimatur, quod non solum ad perspirationem efficacissime augendam, sed ad omnes alias etiam secretiones minuendas, maxime conducat. Detur vinum, praecipue rubrum, ac modice dilutum, quod per intervalla considerate assumptum, sanguini quasi cohaerentiam vel crasin conciliat, et omnes denique humores optimos reddit. Non parvum emolumenti etiam ascribunt auctores succo malorum punicorum, astringentium; decocto myrtillorum, pyrorum, aliorumque id genus fructuum†.

“TALEM morbum, per stomachica, et quae  
 “ humores praeparant ad salubrem perspirationem,  
 “ saepissime superavimus,” ait JOHANNES DE GORTER‡. “HARRIS quoque, postquam impetu morbi,  
 “ macilentus, et pene strigosus devenit aeger, omnibus  
 “ medicamentis incassum adhibitis, formulam sequentem,  
 “ ab hujus sententia inductus, diarrhoea fit  
 “ quasi Diabetes alvi, Diabetes renum diarrhoea,  
 H “ tandem

\* Celsus, loco citato.

† Nic. Piso, loco saepe citato.

‡ De urina, cap. 16. § 9.



“ tandem praescripsit. R. rhei el. incif. unc. fs. fantal.  
 “ alb. citrin. ana drach. i. cardamom. min. drach. fs.  
 “ M. infundantur lento igni, in vaf. clauf. in vin.  
 “ Canarin. opt. lib. i. Quis vero, ait auctor, hu-  
 “ jus vini medicati fuerit effectus ! non longo post  
 “ tempore ex gravissimo hoc morbo perfecte conva-  
 “ luit aeger.”\*

IN aqua cretacea, qualis est Bristolensis, et aqua  
 calcis, cui similis juxta Bathoniam, et in multis  
 aliis denique locis, laudatur †, haud parvum fi-  
 dei, ad eundem finem consequendum, in libro  
 suo de morborum, tam animi quam corporis, sana-  
 tione, habet celeberrimus CHEYNE. Potum quo-  
 que, cum cornu cervi ac gummi Arabici addita-  
 mento, praeparatum ; aqua hordeacea, et omnia  
 id genus mucilaginosorum, blandorum ac refrige-  
 rantium liquorum, qui opobalsamum sanguini ut  
 et adhaesionem optime conciliant, illo spectabili vi-  
 ro magnopere laudantur : Diaeta etiam congenera,  
 lac ex omnibus animalibus ; carnes candidulae om-  
 nes, novellae mollesque ; liquoribus eodem tempore  
 fermentatis ex industria evitatis. Praescribit deni-  
 que

\* Obser. de morb. al. grav. obs. 2. de Diabet.

† Auctor certe minus caute hic loquitur, merito enim dubita-  
 ri possit, quod unquam hujusmodi aqua, absque chymico pro-  
 cessu, occurrenda.



que electuarium, ex cinnabare, cortice Peruviano succoque condensato sambuci confectum †.

HIS vero similibusque non solum nititur spes curationis, sed, magna ex parte, ad regimen idoneum, vitae rationem, ac medicamenta dicta gymnastica, sicut in permultis aliis chronicis, pertinet. Recte itaque notat Nic. PISO, “ Quod animi affectus sint  
 “ moderati, cibi praeterquam quod refrigerent,  
 “ ventrem leniant, et ad ipsum convertant fluorem  
 “ urinae, uti lactuca, portulaca, endivia, carnes  
 “ vervecis, gallinarum elixae, pedes porcorum et  
 “ leporum. Coctu enim difficiles, eligendi cibi,  
 “ non liquidi, ne in urinam convertantur, nempe  
 “ crassi et boni succi et mordacitate carentes. De-  
 “ cet praeterea, abstinere ab acribus falsisque omni-  
 “ bus ‡.” Denique, ad eundem finem attingendum,  
 “ empl. defensivum lumbis applicatum, in uno ca-  
 “ su ; et cingulum latum abdomini arcte circum-  
 “ ductum, in altero, valde proficuum expertus est  
 “ Dr WHYTT.”

MIII

† Vid. the cure of the diseases of the body and mind, p. 174.-5.

‡ Nic. Piso. loc. cit.

MIHI fuit in animo, de quadam aegritudinis nostrae historia (cujus, in hocce opusculo, quaecunque sit, componendo, suppetiis, haud mediocriter me obstrictum refero) inter disputationes eruditissimi HALLERI occurrenda ; nec non et nova theoria, ex legibus mathematicis pendente, aliquid dicere.

*Verum haec ipse equidem, spatiis exclusus iniquis,  
Praetereo, atque aliis post me memoranda relinquo.*

VIRGIL.

RESTAT tantum, venia, ob hocce opusculum inaugurale, adeo ordinis consiliique expers, rursus rogata, ut humanissimos Professores, nec non et condiscipulos aequuos, quibus hujus potestas summa condonandi datur, valere jubeam.

F I N I S.

## E R R A T A,

Cura suumé sollicita haud obstante, quaedam sunt in pagillis praecedentibus, nimis raptim peractis, corrigenda, quorum nonnulla tabulo appposito recensentur.

Pag 11. *pro urina lege urinae.*

17. *pro abstinueret lege abstineret.*

18. *pro hunc vel illud lege hanc vel illam.*

21. *pro exigent lege exigunt.*

ib. *pro innutiles lege inutiles.*

23. *pro possum lege possim.*

35. *pro debet lege debeat.*

ib. *pro affectum lege effectum.*

43. *pro exugere lege exugi.*

44. *pro placit lege placet.*

45. *pro minorum lege minori.*

ib. *pro resistentium lege resistentiae.*



